

ጳውሎስ ጋላቲያ አሳሰ ፃፊዱ ኪታ ጋላ ቆፋ

ዩሱስ አሼይሳ ጊዴይሳ ኦዲያ ዋንጌላ ቃላይ ዲማ ዲማ ቤሳን ሳባኬቲን፣ አይሁዳ ጊደና አሳይ አማኒ አማኒ ቢያ ዎዴ «ኪሪስታኔ ጊደናው ሙሴ ሂጌ ፖላናው ኮሺዬ ኮሺኔ?» ያጊያ ኦይሾይ ኢሲፌ ዴንዲሰ። ሄ ዎዴ ጳውሎስ፣ «ኪሪስታኔ ጊደናው ሙሴ ሂጌ ፖላናው ኮሺና፤ ዩሱሳን ኦራላ ዴዎ ዴማናው ኮሺያ ዋናይ አማኖ። አሳይ ያሳ ሲንሳን ያላናው ዲንዳዔይ አማኖ ያላላን» ያጊዲ ታማርሲሰ። ሺን ጉላ ኢሲያን፣ ጋላቲያ አውራጃን ዴዲያ ዎሳ ኬላን ዴዲያ አሳ ጊደን፣ «አሲ ያሳ ሲንሳን ያላናው ዩሱሳን አማኖ ያላላ ጊደናሺን ሙሴ ሂጊያካ ፖላናው ኮሺስ» ያጊዲ ጳውሎሳ ቲሚርቲያ ጳልቂያ አሳቲ ዴዎሶና።

ጳውሎስ ጋላቲያ ማፃፋ ፃፊዳይ፣ ሄ ባላ ቲሚርቲያን ጨሜቲዳ አሳ ቱማ አማኑዋኮኔ አማኖ ዴዑዋኮ ዛራናሳ። ጳውሎስ ዩሱሳን ሃዋሬ ጊዴይሳ ቲላይዲ ኦዶ ኦይኪሰ። ኢያ ሃዋሬ ኦሲዲ ያጊዳይ አሴ ጊደናሺን ያሳ ጊዴይሳኔ ኢ ኪቲቲዳይ አይሁዳ ጊደና አሳሰ ጊዴይሳ ቆንጨሲዲ ኦዲሰ። ኢያራ ኦይሴሲዲ አሳይ ያላናው ዲንዳዔይ አማኖ ያላላና ጊዴይሳ ኦዴሰ። ወርሴላ ሺምፖታን አማኖ ዴዎይ ዩሱሳን አማኖን ቤንቲያ ሲቆፔ ፑልቲይሳ ጊዴይሳ ኦዴሰ።

ጋላቲያ ኪታ አይፌ ቆፋታ

- ጌሎ ቆፋ 1:1-10
- ጳውሎሳ ሃዋሬቲላ ማታ 1:11-2:21
- ያሳ ኦዶ ኬሃቲላ ዋንጌላ 3:1-4:31
- ላባቲሲኔ አማኖን ዲሱ 5:1-6:10
- ኩሻ ቆፋ 6:11-18

1 አሳፔ ዎይኮ አሳ ባጋራ ጊደናሺን ዩሱስ ኪሪስቶሳፔኔ ኢያ ሃይቆፔ ዴንሲዳ ያሳ አዋፔ ሃዋሬ ጊደና ሜላ ኪቲቲዳ ታ ጳውሎስ፣

2 ታራ ዴዲያ አማኒያ ኢሻቲ ኡባይ፣ ጋላቲያን ዴዲያ ዎሳ ኬላታሰ ኪቲዳ ኪታ።

3 ያሳይ ኑ አዋይኔ ኑ ጎዳ ዬሱስ ኪሪስቶስ ሂንቴው አቶ ኬሃቴላኔ ሳሮቴላ አሞ።

4 ሃ ኢታ ዋዲያፔ ኑና አሻናው፣ ኑ ያሳ፣ ኑ አዋ ሼኔን ኪሪስቶስ ኑ ናጋራ ጊሾ ባና አሊ አሚስ።

5 ያሳሰ ሜሪናፔ ሜሪና ጋካናው ቦንቾይ ጊዶ። አሚንዒ።

ቱማ ዋንጌላይ ኢሲኖ

6 ኪሪስቶሳ አቶ ኬሃቴላን ሂንቴና ጭጊዳ ያሳ አጊዲ፣ ሃራ ዋንጌላኮ፣ ሂንቴ ኤሌሲዲ፣ ዋጊዲ ሲሚዳኮ ታና ማላሊሴስ።

7 ሂንቴና ባሌላናዉኔ ኪሪስቶሳ ዋንጌላ ዋቢሳንው ኮያ ጉላ አሳቲ ዴዎሶናፔ አቲን ቱማ ዋንጌላይ ኢሲኖ።

8 ሺን ኑና ጊዲን ዋይኮ ሳሎ ኪታንቾ ጊዲን ኑኒ ሂንቴው ኮይሮ ኦዲዳ ዋንጌላፔ ዲማቲያ ሃራ ዋንጌላ ሂንቴው ኦዲያባ ጊዲኮ፣ ኢ ቃንጌቲዳባ ጊዶ።

9 ሃይሳፌ ሲንጮ ኑኒ ጊዳይሳዳ ሃዒካ ዛራዳ ጋይስ። ሂንቴ ኤኪዳ ዋንጌላፔ ዲማቲያ ዋንጌላ ኦኒካ ሂንቴው ኦዲኮ ሄ ኤራይ ቃንጌቲዳባ ጊዶ።

10 ያቲን፣ ታና አሲ ናሻና ማላ ኮያይናዬ? ዋይኮ ያሲ ናሻና ማላ ኮያይና? ዋይኮ ታ አሴ ኡፋይሳናው ኮያይና? ታ አሴ ኡፋይሳናው ኮያባ ጊዲኮ፣ ኪሪስቶሳ አይሌ ጊዲኬ።

ጳውሎሳ ጭጌታ

11 ታ አሻቶ፣ ታ ሂንቴው ኦዲዳ ዋንጌላይ አሳፔ ጊዶናይሳ ሂንቴ ኤራና ማላ ታ ኮያይስ።

12 ታው ሃ ዋንጌላ ዬሱስ ኪሪስቶስ ቆንጨሲሲፔ አቲን አሳፔ ኤካቢኬ ዋይኮ አሲ ታና ታማርሲቤና።

13 ታ ካሴ አይሁዴ አማኖን ዴዒያ ዋዴ ዋና ዴዒዳኮ፣ ሂንቴ ሲዒዴታ። ታ ዋሳ ኬላ ቃዴይ ባይና ጎዳናዉኔ ቆይሳናው ባጻታስ።

14 አይሁዴ አማኖ ናጎን፣ ታ ዋዴን ዴዒያ አይሁዴ አሻታፔ አቆይስ። ኑ አዋታ ዋጋሰካ አቆዳ ሚሹታይስ።

15 ሺን ታ ቡሮ ታ አዬ ኡሎን ዴዒሺን ያሳይ ታና ዶሪስ፤ ባ አቶ ኬሃቴላን ታና ጭጌስ።

16 አይሁዴ ጊዶና አሳሰ ዋንጌላ ኦዳና ማላ ያሳይ ባ ናዒ ታው ቆንጨሲዳ ዋዴ ታ ኦዴራካ ዘሬታቢኬ።

1:13 ሃ.ኦ 8:3፤ 22:4-5፤ 26:9-11 1:14 ሃ.ኦ 22:3 1:15 ሃ.ኦ 9:3-6፤ 22:6-10፤ 26:13-18

17 ዎይኮ ታፔ ሲንጤ ሃዋሬ ጊዲዳይሳታራ ጋሄታናው ዩሩሳላሜ ባቢኬ። ሺን ታ ካሴታዳ ኣራቤ ቢታ ባሰ፤ ሄሳፌ ሲማዳ ዳማሰቆ ካታማ ያሰ።

18 ሄሹ ላይላፌ ጉዬ፣ ጳጳሮሳራ ጋሄታናው ዩሩሳላሜ ባዳ ኢያራ ታማኔ ኢቻሹ ጋላሰ ኡታሰ።

19 ሺን ጎዳ ኢሻ ያይቆባፔ ኣቲን ሃንኮ ሃዋሬታ ቤዓቢኬ።

20 ታ ሂንቲው ፃፊይዳይሲ ዋርዶ ጊዶናይሳ ያሳ ሲንላን ሂንቲው ቆንጨሳይሰ።

21 ሄሳፌ ጉዬ፣ ታኒ ሶሪያ ቢታኔ ኪልቂያ ቢታ ባሰ።

22 ዪሁዳን ዴዒያ ዋሳ ኩላ ኣሳይ ታና ቤዒዲ ኤሪቦኮና።

23 ሺን ኤንቲ፣ «ካሴ ኑና ጎዲያ ኡራይ፣ ሃዒ ሄ ኢ ቆይሳናው ኮያ ኣማኑዋባ ሳባኬሰ» ያጌይሳ ሲዒደሶና።

24 ሲዒዳ ኡባይ ታ ጋሶን ያሳ ጋላቲዶሶና።

2

ሃዋሬቲ ጳጳሎሳ ኤኪደሶና

1 ታማኔ ኣይዲ ላይላፌ ጉዬ፣ ባርናባሳራ ዛራዳ ዩሩሳላሜ ባሰ። ሄ ዎዴ ቲቶ ታራ ኤካዳ ባሰ።

2 ያሳይ ታው ቆንጨሲዳ ቆንጨፍላን ያ ባዳ ኣይሁዴ ጊዶና ኣሳ ጊዶን ታ ሳባኪያ ዎንጌላ ኤንታው ቆንጨሳሰ። ካሴ ታ ዎዲያ ዎላይኔ ሃዒካ ታ ዎዲያ ዎላይ ሃዳ ጊዶና ሜላ ጋዳ ካሌጤይሳታ ዲማ ሺሻዳ ኤንታው ኦዳሰ።

3 ሃሪ ኣቶሺን፣ ታራ ዴዒያ ቲቶይ ገሪኬ ኣሲ ጊዲኮካ፣ ቃፃሬቶ ጊዲ ኢንዔሊቦኮና።

4 ጊደሺን፣ ኣማኒያ ኢሻታ ዳኒዲ ኑ ጊዶ ጌሊዳ ኢሶቲ ኢሶቲ ኢ ቃፃሬታና ሜላ ኮዩደሶና። ሄ ኣሳቲ ኪሪሰቶሰ ዩሱሳን ኑሰ ዴዒያ ሳዓቲላ ዎቹዲ ቤዓናው ጌማን ኑ ጊዶ ጌሊዲ ዛሪዲ ኑና ኣይሌ ኦላናው ኮዮሶና።

5 ሺን ቱማ ዎንጌላይ ሂንቲናን ሚኒዲ ዳና ሜላ ኑኒ ሃሪ ኣቶሺን፣ ጉላ ዎዴሰካ ኤንታው ኩሼ ኢሚቦኮ።

6 ሺን ሃላቃ ዳኒያ ኣሳታ ኦናቲላይ ታው ኣይኮካ ጊዴና። ያሳይ ኣሳ ሶዎያ ቤዒዲ ፐርዴና። ሃ ኣሳቲ ታ ማርካቲያ ዎንጌላ ቦላ ጉጂዳባይ ባዎ።

7 ሺን ጳጳሮሲ፡ አይሁዳታስ ዋንጌላ ኦዳና ማላ ያሳይ ኢያው ሃዳራ ኢሚዳይሳዳ ታወካ አይሁዳ ጊደና አሳስ ዋንጌላ ኦዳያ ሃዳራ ኢሚዳይሳ ኤንቲ ጉዬፔ ቤዒዶሶና።

8 ሂዛ፡ ጳጳሮሲ አይሁዳታ ሃዋሪ ጊደና ማላ ኦሊዳ ያሳይ፡ ታካ አይሁዳ ጊደና አሳስ ሃዋሪ ጊደና ማላ ኦሊሰ።

9 ቃሲ ቱሱ ዳኒዲ ቤንቲያ ያይቆቤ፡ ጳጳሮሲኔ ዮሃንሲ፡ ታው ኢሜቲዳ አቶ ከሃቴላ ቤዒዳ ዋዴ ኑራ ኢሲፊዳይሳ ቆንጨሳናው ታ ኩሺያኔ ባርናባሳ ኩሺያ ኦይኪዶሶና። ኑኒ አይሁዳ ጊደና አሳኮ፡ ቃሲ ኤንቲ አይሁዳ አሳኮ ባናው ጊጊዶሶና።

10 ኤንቲ ኑና ሚንሲዲ ሃዳራ ጊዳይ፡ ኑኒ ማንቆታስ ቆፓናይሳ። ካሴካ ታ ሄሳ ኦላናው አሞቴይሰ።

ጳውሎሲ ጳጳሮሳ ቲሚርቲያ ጳልቁስ

11 ጳጳሮሲ አንዎኪያ ካታማ ዪዳ ዋዴ ኢ ባሊዳ ጊሾ ታኒ ኢያ ሶሞዎን «ኑኒ ባላዳሳ» ጋሰ።

12 ያይቆቤ ኪቲዳ ጉላ አሳይ ያናፔ ሲንጼ ኢ አይሁዳ ጊደና አሳራ ሜሰ፡ ሺን ኤንቲ ዪዳፔ ጉዬ፡ «አይሁዳ ጊደና አሳፔ አማኒዳይሳቲ ቃፃሬታናው ቤሴሰ» ጊያ አሳስ ያዪዲ ኤንታፊ ሻኬቲሰ።

13 ቃሲ ሃንኮ አማኒዳ አይሁዳቲ ጳጳሮሳ ሃኑዋ ካሊዶሶና። ሃሪ አቶሺን፡ ባርናባሲካ ኢያ ቆፋን ጎሼቲሰ።

14 ሺን ኤንቲ ዋንጌላ ቱማቴላን ሱሬ ሃሙቶናይሳ ቤዒዳ፡ ጳጳሮሳ አሳ ኡባ ሲንላን፡ «ኑኒ አይሁዳ ጊዳሼ፡ አይሁዳ ዋጋሶ ጊደናሺን አይሁዳ ጊደና አሳዳ ዴዓሳ፤ ያቲን፡ ዋናዳ አይሁዳ ጊደናይሳታ፡ (አይሁዳ ዋጋን ዴዒቲ ጋዳ ዋልቃታይ?) » ያጋሰ።

15 ኑኒ ዬሌታን አይሁዳ፡ ሺን ናጋራንቾ ጊዲዳ አይሁዳ ጊደና አሳ ማላ ጊደኮ።

16 ሺን አሲ ዬሱሰ ኪሪሰቶሳ አማኒዲ ዲሌሲፔ አቲን ሂጌ ናጊዲ ዲሎናይሳ ኤርሰ። ኦኒካ ሂጌ ናጊዲ ዲሎና ጊሾ ኑካ ሂጌ ናጊዲ ጊደናሺን ኪሪሰቶሳን አማኒዲ ዲላና ማላ ኪሪሰቶሰ ዬሱሳ አማኒዳ።

17 ኑ አይሁዳቲካ ኪሪሰቶሳ ባጋራ ዲላናው ኮሺሰ። ሄሳ ጊዲኮ ኑካ ሃራ አሳዳ ናጋራንቾ ጊዳይሳ ቤዖሰ። ያቲን፡ ኑ ናጋራ ኦላና ማላ ዴንጼጼይ ኪሪሰቶሳ ጉሴዬ? ኡባካ ጊዴና!

18 ሂዛ፡ ታ ላሊዳይሳ ዛራዳ ኬዲያባ ጊዲኮ ታኒ ታ ሁዔን ሂጌ ማንጼይሳ ጊዳይሳ ቆንጨሳይሰ።

19 ታኒ ያሳሰ ዳና ሜላ ሂጌ ባጋራ ሂጌስ ሃይቃስ።
 20 ታኒ ኪሪስቶሳራ ማስቃሊያ ቦላ ካቄታሰ። ታኒ ሂዛፔ ታው ዳዒከ። ሺን ኪሪስቶሲ ታናን ዳዒስ። ታ ሃዒ ዳዒያ ዳዑዋ። ታና ደሲዲ ታ ጊሾ ባና አሉ ኢሚዳ ያሳ ናዓ አማናዳ ዳዒይስ።
 21 ታኒ ያሳ አጼ ከሃቴላ ሃዳ አሉከ። ዒሎቴሉ አሳሰ ሂጌ ባጋራ ቤንቴያባ ጊዲያኮ። ኪሪስቶሲ ጮ ሃይቄስ ጉሱ።

3

ዒሎቴሉ አማናና

1 ሂንቴኖ፣ አከኪ ባይና ጋላቲያ አሳው፣ ሂንቴ አይፊያ ሲንላን ኪሪስቶሲ ማስቃሊ ቦላ ካቄቲዳ ሚሲሌዳ ቆንጨዲ ቤንቴስ። ያቲን፣ ቱማስ ሂንቴ ኪቴቶና ሜላ ሂንቴና ቢቴዳይ ኦኔ?
 2 ታ ኢሲባ ኤራናው ኮያይስ፤ ሂንቴ ጌሻ አያና ኤኪዳይ ሂጌ ናጊዲዬ ዋይኮ ሂንቴ ሲዒዳ ዋንጌላ አማኒዲ ኤኪዳይ?
 3 ሂንቴ ሃሳ ሜላ ኤዬ? ሂንቴ ያሳ አያናን ደሚዲ፣ ሃዒ ዋልቃን ፖላናው ኮዬቲ?
 4 ሂንቴ ዋንጌላ ጋሶን ዳሮ ዋዬቲዳይ ሜሌ? ሄ ዋዬ ኡባይ ጮ ጊዲዳ?
 5 ያሳይ ሂንቴው ጌሻ አያና ኢሜይኔ ሂንቴ ጊደን ማላታታ አሉይ፣ ሂንቴ ሂጌ ናጊዳ ጊሾዬ ዋይኮ ዋንጌላ ሲዒዲ አማኒዳ ጊሾ?
 6 ኦኔ አብራሃሜ ቤዒቲ፣ «ኢ ያሳ አማኒስ፤ ያሳይ ኢያው ሃሳ ዒሎቴሉ አሉዲ ኤኪስ» ጌቴቲዲ ፃፊቲስ።
 7 ሂዛ፣ አማኔይሳቲ አብራሃሜ ናይታ ጊዳይሳ ኤሪቴ።
 8 ያሳይ አይሁዳ ጊደና አሳ አማኖን ዒሊሳናይሳ ጌሻ ማፃፋይ ቤዒዲ፣ «ካዋቴላ ኡባይ ኔናን አንጃታና» ያጊዲ፣ ዋንጌላ አብራሃሜስ ካሴቲዲ አዲስ።
 9 ሃሳ ጊሾ፣ አማኒያ ኡባይ አማኒዳ አብራሃሜራ ኢሲፊ አንጃቲዳሶና።
 10 ሂጌ ናጊዲ ዒላና ጊያ ኦኒካ ቃንጌቲዳይሳ። አይስ ጊኮ፣ ጌሻ ማፃፋን፣ «ሂጌ ማፃፋን ፃፊቲዳ ኡባ ናጎና ኦኒካ ቃንጌቲዳይሳ ጊደ» ጌቴቲዲ ፃፊቲስ።
 11 «ዒሎይ አማኖን ዳና» ጌቴቲዲ ፃፊቲዳ ጊሾ ኦኒካ ያሳ ሲንላን ሂጌ ናጊዲ ዒሎናይሲ ኤሬቲዳባ።

3:6 ሜጲ 15:6፤ ሮሜ 4:3 3:7 ሮሜ 4:16 3:8 ሜጲ 12:3 3:10
 ዛሬ 27:26 3:11 ኢብ 2:4

12 ሂጌይ አማኖን ዘምፐና። ሺን፣ «ሂጌያ ናጌያ ኦኒካ ሂጌያን ዴዖን ዳና» ያጌሰ።

13 «ሚላ ቦላ ካቁተዲ ሃይቂያ ኦኒካ ቃንጌተዳይሳ» ጌቴቴ ፃፌተዳ ጊሾ ኪሪሰቶሲ ኑ ጊሾ ቃንጌተዳይሳ ጊዲዲ፣ ኑና ሂጌ ቃንጌላፌ ዋዚሰ።

14 ያሳይ ኣብራሃሚስ ኢሚዳ ኣንጅይ፣ ዩሱስ ኪሪሰቶሳ ባጋራ ኣይሁዴ ጊደና ኣሳ ጋካና ሚላኔ ያሳይ ኢሚና ጊዳ ጌሻ ኣያና ኦኒ አማኖን ኤካና ሚላ ሄሳ ኦሊሰ።

ሂጌኔ ኡፋይሳ ቃላ

15 ታ ኢሻቶ፣ ታ ሂንቴው ኣሳ ዴዖን ሚዜ ጊዲዲ ዴዲያባ ለሚሶ ኦላዳ ኦዳይሰ። ኣሲ ጫቂዳ ጫቆይ ሚኒዳፔ ጉዬ፣ ኦኒካ ሄ ጫቁዋ ሻራናው ዋይኮ ኢያ ቦላ ሃራ ጉጃናው ዳንዳዔና።

16 ያሳይ ሄ ኬኬ ቃላ ኣብራሃሚሰኔ ኢያ ዜሬላሰ ኢሚሰ። ጌሻ ማፃፋይ፣ ደሮ ኣሳሰ ኦዲያዳ፣ «ኔ ዜሬላታሰ» ጌና። ሺን ኢሲ ኣሳሰ ኦዲያዳ፣ «ኔ ዜሬላሰ» ያጌሰ፤ ኢካ ኪሪሰቶሳ።

17 ታኒ ጌይ ሃይሳ፤ ኦይዱ ፃታኔ ሃሰታው ላይላፌ ጉዬ ኢሚቴዳ ሂጌይ፣ ኮይሮ ያሳይ ሚንሉዳ ጫቁዋ ሻሪዲ ኡፋይሳ ቃላ ጳይሳናው ዳንዳዔና።

18 ያሳይ ኢሚያ ላታይ ሂጌን ኤኬቴያባ ጊዲያኮ ያሳይ ኢሚዳ ኡፋይሳ ባጋራ ጊዴይሲ ኣቴሰ። ሺን ያሳይ ባ ኣጵ ኬሃቴላን ላታ ኣብራሃሚስ ኡፋይሳ ቃላ ባጋራ ኢሚሰ።

19 ያቴን፣ ሂጌይ ኣይሰ ኢሚቴዳ? ሂጌይ ኢሚቴዳይ፣ ኣብራሃሚስ ኡፋይሳ ቃላ ኢሚቴዳ ዜሬላይ ያና ጋካናው ኢታ ኦሶይ ኣይቤኮ ኤሪሳናሳ። ሂጌይ ኪታንቸታ ባጋራ ኢሚቴዳ፣ ጊደ ጊዲዲ ሲጌሉያ ኢሲ ኣሳ ባጋራ ኦሶ ቦላ ፔዒሰ።

20 ጊደ ጊዲዲ ሲጌሉያ ኡራይ ኢሲ ኣሳ ፃላላሰ ጊደና፣ ሺን ያሳይ ኢሲኖ።

21 ያቴን፣ ሂጌይ ያሳ ኡፋይሳ ቃላራ ኤቁቴዬ? ኣካይ፣ ጊደና! ሂጌይ ኢሚቴዳይ ኣሳሰ ዴዖ ኢሚናው ጊዲያኮ፣ ጊሎቴሉ ሂጌ ባጋራ ቤንታናሺን።

22 ሺን ዩሱስ ኪሪሰቶሳ ኣማኒን ቤንቲያ ኡፋይሳ ቃላይ ኣማኔይሳታሰ ኢሚታና ሚላ ኩሚላ ኣላሚይ ናጋራሰ ሃሬቴዲ ዴዔይሳ ጌሻ ማፃፋይ ኦዴሰ።

3:12 ለዌ 18:5 3:13 ዛሬ 21:23 3:16 ሜጲ 12:7 3:17 ኬሳ 12:40 3:18 ሮሜ 4:14

23 ሺን አማኖይ ያናፔ ካሴ ሂጌይ ኑና ቃቺ ዋሊስ። ሄ አማኖይ ቆንጫና ጋካናው ሂጌይ ኑ ቦላ ጎርዲ ዋሊስ።

24 ሄሳ ጊሾ፣ ኑኒ አማኖን ጂላና ሜላ ኪሪሰቶሲ ያና ጋካናው ሂጌይ ናዓ ናጊያ አሳ ሜላ ኑና ናጌይሳ ጊዲስ።

25 ሺን ሃዒ አማኖይ ዪዳ ጊሾ ሂጌይ ሂዛፔ ጉዬ ናዓ ናጊያ አሳ ሜላ ኑና ናጌይሲ አቲስ።

26 ሂንቴ ኡባይ ዬሱስ ኪሪሰቶሳ አማኒዲ ያሳ ናይታ ጊዲዴታ።

27 ኪሪሰቶሳራ ኢሲኖ ጊዳናው ፃማቄቲዳ ኡባይ ኪሪሰቶሳ ማዖዳ ማዒዴታ።

28 ሂንቴ ኡባይ ኪሪሰቶሳን ኢሲኖ ጊዲያ ጊሾ አይሁዴ አሳ ጊዶኒኔ ጌሪኬ አሳ ጊዶን፣ አይሌ ጊዶኒኔ ዋማኖ ጊዶን፣ አዴ ጊዶኒኔ ማጫሳ ጊዶን ዲማቴሳ ባዋ።

29 ሂዛ፣ ሂንቴ ኪሪሰቶሳሳ ጊዲኮ ሂንቴ አብራሃሜ ዛሬ። ያሳ ኡፋይሳ ቃላዳ ሂንቴ ላቴይሳታ።

4

1 ታ ጌይሲ ሃይሳ። ላቴይ ናዓ ጊዲ ዴዒሼ፣ ሻሎ ኡባይ ኢያባ ጊዲኮካ፣ ኢ አይሌፌ አይኮካ ዲማቴና።

2 ሺን ኢያ አዋይ ጊዳ ዋዴይ ጋካናው ኢ ሃዳራ ኤኪዳይሳታ ኩሼኒኔ ናጌይሳታ ኩሼን ዴዒስ።

3 ሄሳዳካ፣ ኑኒ ናዓቴላን ዴዒያ ዋዴ አላሚያ ዋጋስ አይሌቴዲ ዴዒዳ።

4 ሺን ዋዴይ ጋኪዳ ዋዴ ያሳይ ሂጌፌ ጋርሳን፣ ማጫሳፔ ዬሌቲዳ ባ ናዓ ከቲስ።

5 ኢ ሄሳ ኦሊዳይ፣ ሂጌስ ሃሬቲዲ ዴዒይሳታ ዋዛናዉኔ ኑና ባ ናይታ ኦላናሳ።

6 ኑ ያሳ ናይታ ጊዲያ ጊሾ «አባ፣ አዋው» ጊዲ ጂጊያ ባ ናዓ አያና ኑ ዋዛና ጊዶ ከቲስ።

7 ሄሳ ጊሾ፣ ሂዛፔ ኔኒ ያሳ ናዓፔ አቲን አይሌ ጊዳካ። ኔኒ ኢያ ናዓ ጊዲኮ፣ ያሳ ላቴይሳ ጊዳዳሳ።

ጳውሎሲ ጋላቲያ አሳስ ቆፒስ

8 ሂንቴ ካሴ ያሳ ኤርና ዋዴ ያሴ ጊዳናይሳታስ አይሌ ጊዲዲ ሃሬቲዴታ።

9 ሺን ሃዲ ሂንቴ ያሳ ኤሪዳታ፤ ኡባራካ ያሳን ኤሪቴዳታ።
ያቲን ፓሶና ኅያና ኣላሚ ዋጋታኮ ጉዬ ዋኒዲ ሲሜቲ? ዋዲ
ኤቂዲ፣ ዋኒዲ ኤንታው ኣይሌ ገዳናው ኮዬቲ?

10 ዲማ ገዲዳ ጋላሳታ፣ ኣገናታ፣ ዋዴታኔ ላይላታ ሂንቴ
ሎይሊ ቦንቼታ።

11 ታና ሂንቴባይ ያሹሰ፤ ታ ሂንቴው ጮ ዳቡራዲናሻ?

12 ታ ኢሻቶ፣ ታ ሂንቴዳ ሃኒዳ ገሾ ሂንቴካ ታዳ ሃኒቴ ጋዳ
ሂንቴና ዋሳይሰ። ሂንቴ ታና ኣይቢንካ ቆሃቤኬታ።

13 ታኒ ኮይር ሃርጌታሽ ሂንቴው ዋንጌላ ኦዲዳይሳ ሂንቴ
ኤሪታ።

14 ታ ሃርጌይ ሂንቴው ፓጩ ገዲኮካ፣ ታና ሳሌቲቤኬታ፤
ኢዲቤኬታ። ሺን ታና ያሳ ኪታንቾ ዋይኮ ኪሪሰቶሰ ዬሱሳ
ሞኬይሳዳ ሞኪዳታ።

15 ያቲን፣ ሄ ሂንቴው ዳዲያ ኡፋይሳይ ኡባይ ኣው ቢዳ?
ሂንቴው ዳንዳዔቲዳኮ፣ ሂንቴ ታው፣ ሂንቴ ኣይፊያ ኬሲዲ
ኢሚያኮ ኢያናይሳ ታ ማርካታይሰ።

16 ያቲን፣ ታ ሂንቴው ቱማ ኦዲዳ ገሾ ሂንቴው ሞርኬ
ገዳዲናዬ?

17 ሄ ኣሳቲ ሂንቴና ባንታኮ ዛራናው ኮዮሶና፣ ሺን ኤንታ ቆፋይ
ሎዶሳ ገዳና። ኤንታ ቆፋይ ሂንቴና ሻካናሳኔ ሂንቴ ኤንታው ቆፓና
ሜላ ኦሳናሳ።

18 ሎዶሳ ኦሳናው ኣሞቲኮ ሎዶ፣ ሺን ሄሲ ታ ሂንቴራ ዳዲያ
ዋዴ ያላላ ገደናሺን ኡባ ዋዴ ገድ።

19 ታ ሰቆ ናይቶ፣ ኪሪሰቶሲ ሂንቴናን ሚሲሌታና ጋካናው
ዬሎሰ ማጫሲ ሚዶቲይሳዳ ታ ሂንቴ ገሾ ሚዶታይሰ።

20 ሂንቴባይ ታው ሃዲርሲ ገዲን ታ ኡንዔታሰ፤ ሃዲ ሂንቴ
ገደን ታ ቤንታዳ ሽኔታዳ ኦዲያኮ ኣይ ሜላ ደሳይናሺን።

ኣጋርኔ ሳር

21 ሙሴ ሂንጌን ሃሪቲዲ ዳናው ኮዬይሳቶ፣ ኣኔ ታው ኦዲቴ፤
ሂጌይ ኣይ ገያኮ ኤሪኬቲ?

22 ጌሻ ማፃፋይ፣ «ኣብራሃሚሰ ኣይሌፊኔ ጎዳቴፊ ዬሌቲዳ
ናሞው ናይቲ ዳዎሶና» ያጌሰ።

23 ኣይሌ ናዓይ ኣሲ ናዓ ዬሊያ ማራን ዬሌቲሰ፣ ሺን ጎዳቴ
ናዓይ ያሳ ኡፋይሳ ቃላን ዬሌቲሰ።

24 ሃ ማጫሳቲ ናምዑ ጫቆታስ ለሚሶ ጊዲዲ ኤኬቶሶና። ኤንታፌ ኢሲኒያ፣ ሲና ዴሪያፔ ዩዲራ፣ ባ ናይታ ኣይሌቴላስ ዩላሱ፤ ኢያካ ኣጋር።

25 ኣጋራ ኣራቤ ቢታን ዴዲያ ሲና ዴሪያን ለሚሶታዳ ሃዒ ዴዲያ ዩራሳላሜ ዳናዉሱ። ኣይስ ጊኮ፣ ኢያ ባ ናይታራ ኣይሌቴላን ዳዓዉሱ።

26 ሺን ሳሎን ዴዲያ ዩራሳላሜይ ኣይሌቴላን ዳዑኩ፤ ኢያ ኑ ኡባስ ኣዮ።

27 ጌሻ ማፃፋይ፡
«ናቴ፣ ዩሎና ማይንጹቴ ኡፋይታ፤
ናቴ ሚዖታ ኤርናሬ ኢሊላ።
ኣዚናራ ዴዲያ ማጫሶፔ፡

ኣዚኒ ባይና ማጫሶስ ናይቲ ዳር» ያጌስ።

28 ታ ኣሻቶ፣ ሂንቴ ዩሳቃዳ ያሳ ኡፋይሳ ቃላን ዩሌቲዳ ናይታ።

29 ሺን ሄ ዋዴ ኣሳ ማራዳ ዩሌቲዳይሲ፣ ኣያና ዋልቃን ዩሌቲዳይሳ ጎዲስ። ሃቺካ ሄሳ ሜላ።

30 ሺን ጌሻ ማፃፋይ ዋይጊ? «ኣይሌ ናዓይ ጎዳቴ ናዓራ ኢሲፌ ላቶና ጊሾ ኣይለው ኢ ናዓራ ዋላ ኬሳ ዩዳ» ያጌስ።

31 ሄሳ ጊሾ፣ ታ ኣሻቶ፣ ኑኒ ጎዳቴ ናይታፔ ኣቲን ኣይሌ ናይታ ጊዶኮ።

5

ኪሪሰቶሳን ዴዲያ ላዓቴላ

1 ኑኒ ላዓቴላን ዳና ሜላ ኪሪሰቶሲ ኑና ኣይሌቴላፌ ኬሲስ። ሂዛ፣ ሚኒዲ ኤቂቴ፤ ዛሪዲ ኣይሌቴላ ቃምባራን ጌሎፒቴ።

2 ታ፣ ጳዉሎስ፣ ጌይሳ ሰዒቲ። ሂንቴ ቃፃሬታናው ኮይኮ፣ ኪሪሰቶሲ ሂንቴና ኣይኮካ ማዴና።

3 ቃፃሬቲያ ኦኒካ ሂጌይ ከቲያ ኡባ ፖላናው ቤሴይሳ ጉጃዳ ታ ኦዳይስ።

4 ሂጌ ናጊዲ ያላናው ኮዩይሳቶ፣ ኪሪሰቶሳፔ ሻኬቲዳታ፤ ያሳ ኣጶ ኬሃቴላፌ ኩንዲዳታ።

5 ሺን ኑኒ ያሳ ኣያና ባጋራ ኣማኖን ያላናው ኡፋይሳን ናጎስ።

6 ሂዛ፣ ኪሪሰቶስ ዩሱሳን ዴዲኮ፣ ሲቆን ቆንጨያ ኣማኖፔ ኣቲን ቃፃሬቲን፣ ቃፃሬቶና ኣጊን ኑና ኣይኮካ ማዴና።

4:27 ኢሳ 54:1 4:29 ሜዴ 21:9 4:30 ሜዴ 21:10

7 ካሴ ሂንቴ ሎዎ ዎዌታ፡ ሺን ሃዒ ቱማሰ ኪቴቶና ማላ ሂንቴና ዲጊዲይ ኦኔ?

8 ሃይሳ ማላ ኢታ ጨሞይ ሂንቴና ያጊዳ ያሳፌ ዩቤና።

9 ሄሲካ፡ «ጉሳ ኢርሾይ ሙኑቃ ኡባ ዳንፊሰ።» ጌቴቴዲ ዓፌቴዳይሳ ማላ።

10 ሂንቴው ሃራ ቆፊ ባይናይሳሰ ታ ጎዳን አማኔታይሰ። ሺን ሂንቴና ቡቂያ ኦኒካ ያሳፌ ባ ፒርዳ ኤካና።

11 ታ አሻቶ፡ ታ ሃዒ ጋካናው ቃፃሮ ሳባኪያባ ጊዲኮ፡ ያቲን ታና አይሰ ጎዶና? ሄሲ ቱማ ጊዲያኮ ኪሪሰቶሳ ማሰቃሊያባ ታማርሶይ አሳሰ ቆቤ ጊዳናሺን።

12 ሂንቴና ቡቂይሳቲ ቃፃሬቴላ ዓላላ ጊዶናሺን ባንታና ቃራቴያኮካ ታ ደሳይሰ።

13 ታ አሻቶ፡ ሂንቴ ላዓ ዳናው ያጌቴዳታ። ጊዶሺን፡ ሂንቴ ላዓቴሳይ አሾ አሞ ፖላናው ሂንቴው ጋሶ ጊዶፖ፤ ሄሳፌ አሊዲ ኢሶይ ኢሱዋ ሲቆን ማዲቴ።

14 ሂጌ ኡባይ፡ «አሴ ኔዳ ደሳ» ያጊያ ኢሲ ቃላን ቃሼቴሰ።

15 ሺን ሂንቴ ኢሶይ ኢሱዋራ ሳዌቴያባኔ ማቴቴያባ ጊዲኮ፡ ሂንቴ ዎሊ ዉርሶና ማላ ናጌቴቴ።

አያና ዴዎኔ አሾ ዴዎ

16 ሂዛ፡ ታ ሂንቴው ኦዳይሰ፤ አያናን ዴዒቴ፤ ሂንቴ አሾ አሙዋ ፖሎፒቴ።

17 አሾ አሞይ አያና አሙዋራ ሞርኬ፤ ቃሲ አያና አሞይካ አሾ አሙዋራ ሞርኬ። ኤንቴ ኢሶይ ኢሱዋራ ኢዳቴያ ጊሾ ሂንቴ ደሲያባ አላናው ዳንዳዔኬታ።

18 ሺን አያናይ ሂንቴና ካሌሊያባ ጊዲኮ ሂጌይ ሂንቴና ሃሬና።

19 አሾ ኦሶቴ ኤሬቴዳይሳታ፤ ኤንቴካ፡ ላይማቴሌ፡ ቴናቴሌ፡ ቃይዌ፡

20 ኤቃ ጎይኖ፡ ቢታ፡ ሞርኬቴሌ፡ ካቺ፡ ቃናቴ፡ ሃንቆ፡ ባና ደሶ፡ ሻኬቴሌ፡ ኢታ ቶቤ

21 ጌኔ፡ ማላ፡ ዩሊኔ ሄሳ ሄሳ ማላታ። ካሴ ታ ሂንቴው ኦዲዳይሳዳ ሃዒካ ታ ሂንቴው ኦዳይሰ። ሃይሳ ማላባታ ኦፊይሳቲ ያሳ ካዎቴላ ላቶኮና።

22 ሺን አያና አይፊይ፡ ሲቆ፡ ኡፋይሲ፡ ሳርቴሌ፡ ዳንዳዓ፡ ኬሃቴሌ፡ ሎዎቴሌ፡ አማኖ፡

23 አሽኬቴሌ፡ ባና ሃር። ሃይሳ ማላባታ ኢዲያ ሂጌይ ባዎ።

5:9 1ቆር 5:6 5:14 ለዌ 19:18 5:17 ሮሜ 7:15-23

24 ኪሪስቶስ ዩሱሳባ ጊዲዳይሳቲ ባንታ አሹዋ ኢያ ኢታ ቆፋራኔ ኢያ አሙዋራ ኢሲፌ ማሰቃሊያ ቦላ ካቂደሶና።

25 ኑ ኣያናን ዳዒያባ ጊዲኮ፡ ኑና ኣያናይ ካሌሶ።

26 ኣኔ ኢሶይ ኢሱዋ ዩሎዩሼኔ ቃናቲሼ ጮ ጨቁቲይሳ አጎሰ።

6

ኢሶይ ኢሱዋ ማዲቲ

1 ታ አሻቶ፡ ኢሲ አሲ ናጋራን ኩንዲኮ፡ ኣያናን ዳዒያ ሂንቴ ሄ ኡራ አሽኩቴላን ሱሪሲቴ። ሺን ኔኒ ሄሳ ሜላባን ፓጨቶና ሜላ ኔና ናጋ።

2 ኢሶይ ኢሱዋ ዳዎ ቶሁዋ ቶኪቴ። ያቲኮ ኪሪስቶሳ ሂጊያ ፖሌታ።

3 ኢሲ አሲ ኣይኮይካ ባዋሺን፡ ባና ሃራታፔ ሎዎ ጊዲ ቆፒኮ፡ ኢ ባና ጨሜሰ።

4 ሺን ኢሲ ኢሲ ኣሲ ባ ኦሱዋ ፓጮ። ሄሳፌ ጉዬ፡ ሃራታራ ባና ጋዴዬይሳ አጊዲ ባው ጨቁቲያባ ዳሜሰ።

5 ኢሲ ኢሲ ኣሲ ባ ቶሁዋ ባው ቶካናው ቤሴሰ።

6 ያሳ ቃላ ታማሪያ ኦኒካ ሎዎባ ኡባ ባ አሰታማሪያራ ሻኬቴሰ።

7 ሂንቴ፡ ሂንቴና ጨሞፊቴ። ኣሲ ባ ዜሪዳባ ዛሪዲ ጫኪያ ጊሾ ያሳ ቦላ ቁልቁሶፒቴ።

8 ባ አሾ አሙዋ ኩንላናው ዜሪያ ኦኒካ፡ ባ አሾ አሙዋፔ ሃይቆ ቡጫና። ሺን ኣያና ኡፋይሳናው ዜሪያ ኦኒካ ኣያናፔ ሜሪና ዳዎ ጫካና።

9 ኣኔ ሎዎ ኦሶ ኦላናው ኣዛሌይሳ አጎሰ። ኑኒ ኣዛሎና ኢዳኮ ዎዳይ ጋኪያ ዎዳ ኑ ዜሪዳይሳ ጫካና።

10 ኑ ኢንጃ ዎዳ ዳሚኮ፡ ኣሳ ኡባሰ፡ ኣሊዲካ ኣማኒያ ኣሳሰ ሎዎባ ኦሶሰ።

ዉርሴላ ዞሬኔ ሳርታ

11 ታኒ ታ ኩሼን፡ ኣይ ሜላ ጊታ ፒዳሌን ሂንቴው ፃፊዳኮ ቤዒቴ።

12 ኣሳ ሲንላን ሎዎ ጊዲዲ ቤንታናው ኮያ ኣሳቲ ሂንቴ ቃፃሬታና ሜላ ኮዮሶና። ሺን ሄሳ ኤንቴ ኦጼይ፡ ኪሪስቶሳ ማሰቃሊያ ጊሾ ኤንታና ጎዲ ጋኮና ሜላሳ።

13 ኤንቴ ሂንቴ ቃፃሬቲላን ጨቁታናው ኮዩዲ ሂንቴና ቃፃሬቶ ጎሶናፔ ኣቲን ቃፃሬቲዳይሳቲካ ባንታ ሁዔን ሂጊያ ናጎኮና።

14 ሺን አላሜይ ታው ካቋተዳይሳፌኔ ታኒካ አላሚያሰ ካቋተዳ፣ ጎዳ ዩሱስ ኪሪስቶስ ማስቃሊያፕ ኣቲን ሃራ ጨቄቴሉ ታፔ ሃኮ።

15 ሂዛ፣ ቃፃሬቲን ቃፃሬቶና ኣኒን ኣይኮካ ማዳና። ማዳይ ኦራላ ማዲቴሉ ጊዶ።

16 ሃ ዋጋ ካሊያ ኡባሲኔ ያሳ ዳሬ ጊዲዳ ኢስራዔሌስ ሳርቴላይኔ ማርቴላይ ጊዶ።

17 ታኒ ዩሱስ ማዲንዲዳ ቤታ ታ ኣሳቴላን ቶኪዳ ጊሾ ሂዛፔ ታና ኣኒካ ዋይሶፖ።

18 ታ ኢሻቶ፣ ኦ ጎዳ ዩሱስ ኪሪስቶስ ኣቶ ኬሃቴላይ ሂንቴራ ጊዶ። ኣሚንዒ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5